

Universitato de Esperanto

Per la retejo www.universitato.info oni povas lerni kaj studi per Esperanto universitatajn temojn pri ne-Esperantaj aferoj. Ne-Esperantistoj nun povas agnoski, ke kompletaj, universitataj kursoj tute en Esperanto eblas kaj okazas. La Universitato de Esperanto baziĝas sur la nuntempaj modeloj de „Open Course Ware“, kiel videblaj ĉe la Universitatoj de Yale kaj de Berkeley. Iliaj kaj la Esperantaj kursoj estas kompletaj, kun ĉirkaŭ 40 horoj da lecionoj. Ili estas filmitaj kaj disponeblaj interrete sub la licenco Krea Komunaĵo.

(www.universitato.info)

Premioj de Fondaĵo

Antoni Grabowski

Fondaĵo Antoni Grabowski celas subteni la Esperantan kulturon. Ĝi aljuĝas premiojn kaj subvenciojn mezume ĉiun 2-an aŭ 3-an jaron. En la Hanoja UK estis anoncigitaj la ĉi-jaraj premioj. Premion de 650 usonaj dolaroj ricevis la elstara figuro de la Esperanta kulturo, specife beletro, la Nederlanda intelektulo Gerrit Berveling. Premion je la sumo de 500 dolaroj ricevis la Esperanto-aranĝo ARKONES.

(Gazetaraj Komunikoj de UEA)

La 125-jariĝo de Esperanto estis solenita en Pola Senato

Okaze de la jubileo de Esperanto kaj de la Eŭropa Tago de Lingvoj estis organizita konferenco en la Pola Senatejo kun ekspozicio flanke de Eŭropo-Demokratio-Esperanto - PL. La ekspozicion finance subtenis mecenato Etsuo Miyoshi, kiu estis feste akceptita kiel Honora Membro de EDE-PL. Okazis inaŭguro de Parlamenta-Senata Grupo por promocio de Esperanto, kiun gvidis prof. Edmund Wittbrodt. Sekvis inaŭguro de jubilea ekspozicio, kiu estis ankaŭ vizitata de reprezentantoj de la japana ambasadejo. Tra la ekspozicio gvidis vicprezidanto de EDE-PL E. Kozyra kaj la aranĝon filmis televido

el Malbork. La konferencon malfermis vicprezidanto de Pola Senato Jan Wyrowiński kaj tra la konferenco gvidis M. Komarnicka. S-ro Miyoshi invitis la politikistojn kaj kelkajn Esperantistojn al festa vespermanĝo por pli detale preparoli venontajn paŝojn. (*Eŭropa Bulteno*, nr-o 120 kaj *La Ondo de Esperanto*, <http://sezonoj.ru/2012/10/217senato/>)

Pli riĉa kaj ampleksa biblioteko planata por renovigita Lernu

La nova biblioteko, kiu lanĉiĝos kun la nova Lernu komence de 2013, estos multe pli riĉa ol la nuna; ĝi inkluzivos multajn verkojn de Esperanto-literaturo, kaj ankaŭ sonojn kaj filmetojn kun akompana teksto. La planata biblioteko estos utila aparte al komencantoj, pro la eblo traduki vortojn per simpla klako, sed ĝia enhavo estos sufiĉe profunda por esti interesa al Esperantistoj de ĉiuj niveloj. Se vi volas kontribui al la projekto, la Lernu-teamo (teamo@lernu.net) serĉas subtenantojn kaj volontulojn por helpi enmeti tekstojn. (<http://kampanjo.ikso.net/eo/>) (www.liberafolio.org/2012/nova-reta-biblioteko-aperos-ce-lernu)

Artlibro pri arkitekturo en Esperanto

La tradukentrepreno LinguaForce (Rennes, Francio) lingve helpis la germanan arkitektur-studion Kuehn-Malvezzi por la ekspozicio „Komuna Fundamento“ prezentata okaze de la 13-a internacia ekspozicio pri arkitekturo „Common Ground“, kiu okazis kadre de Venecia Bienalo. La arkitektura studio Kuehn-Malvezzi kreis tion, kio verŝajne estas la unua artlibro en Esperanto pri arkitekturo. „Komuna Fundamento“ estas Esperantigo de „Common Ground“, la nomo de la ĝenerala ekspozicio. Samokaze, libro samnoma estis eldonita tute en Esperanto de Mousse Publishing (*Komuna Fundamento*, 33 €, ISBN 978-88-6749-027-1). (www.moussepublishing.com/printed/kuehn_malvezzi/komuna_fundamento.php)

Mazaradelvalo, 79-a Itala Kongreso de Esperanto

En Mazaradelvalo (Sicilio) partoprenis 328 homoj en la 79-a Itala Kongreso de Esperanto, okazinta en Aŭgusto. Pli ol la duono de la kongresanoj estis eksterlandanoj el ĉiuj 5 kontinentoj. Kongrestemo estis fama citaĵo el la festparolado de L. L. Zamenhof ĉe la 1-a Universala Kongreso en Boulogne-sur-Mer (1905): Sed homoj kun homoj. En Mazaro, la Kongresa Komitato trovis ĉe la urbestro ne nur kunlaborem, sed ankaŭ entuziasman aliĝon al Esperantismaj idealoj; la urbestro mem deziresprimas, ke la urbo iĝu simbol-urbo de Esperanto. Inter la iniciatoj menciindas kursoj de Esperanto en ĉiuj Mazaraj lernejoj, en kiuj partoprenis pli ol 500 lernantoj, dum pliaj kursoj estas planitaj por sekvontaj jaroj. En la gazeto *La Ondo de Esperanto* Renato Corsetti raportas pri la tre vigla, interesa kaj – ĉiusence – „kunveniga“ kongreso. Venontjare la Itala Kongreso okazos en Kastelaro (Castellaro) apud Sanremo ĉe la Bordo Lazura. (*Eŭropa Bulteno* Septembro 2012, No 119)

(<http://sezonoj.ru/2012/09/la-79a-kvazauitala-esperanto-kongreso/>)

170 000 artikoloj en la Esperanta Vikipedio

Septembre la Esperanta Vikipedio (<http://eo.wikipedia.org>) atingis 170.000 artikolojn. Ĝi aktuale tenas lokon 27 kompare kun naciaj Vikipedioj, antaŭ ekzemple la Dana, Serba, Litova kaj Hebrea versioj. Ĉiuhore estas ĉ. 10.000 paĝorigardoj ĉe la Esperanto-versio. Laŭ la ofteco de uzado Esperanto okupas lokon 41. La Esperanto-Vikipedio tiurilate ne estas unika projekto: Esperanto dum la pasintaj jaroj ekhavis tradukojn de Facebook, Mozilla Firefox kaj de la Linux-versio Ubuntu; ĝi estas traduklingvo de Google Translate kaj ĝi eniris kun pli ol 200.000 frazoj la multlingvan frazokolekton Tatoeba <http://tatoeba.org/epo/wall/>

index). (http://eo.wikipedia.org/wiki/Wikipedia:Internacia_Vikipedio#Pli_ol_100_000_artikoloj)

(Lu Wunsch-Rolshoven,
EsperantoLand)

En Prago nun ekzistas haltejo kun la nomo Zamenhof

Haltejo „Stavoservis“ havas novan nomon laŭ la strato de Zamenhof. Tiu ĉi ŝanĝo ne estas ideo de Esperantistoj, sed de Transporta kompanio de Prago. Celo estas faciligi al homoj vojaĝojn kaj pli facile trovi konekton al la strato de Zamenhof, ĉar antaŭe oni devis scii, ke oni serĉu „Stavoservis“ (Konstru-servo).

(www.esperanto.cz/eo/aktualy/en-prago-nun-ekzistas-haltejo-de-zamenhof.html)

La UEA-revuo Esperanto rete por membroj kun gvidlibro

En la oktobra numero de la revuo Esperanto aperas la kotiztabelo de UEA por la jaro 2013. Ĉiuj eŭraj kotizoj restas samaj kiel en 2012. Grava ŝanĝo koncernas la kategorion Membro kun Gvidlibro (MG). En 2013 ankaŭ la membroj, kiuj pagas MG-kotizon, rajtos legi la revuon Esperanto rete. Sekve, en la landoj, kies kotizo estas sama kiel por Nederlando, sufiĉas pagi 10 € por tio. Membroj kun Gvidlibro eĉ povas facile regajni la kotizon utiligante sian rajton mendi dufoje dum la jaro librojn k.a. varojn ĉe la Libroservo kun 10%-a rabato. La kotiztabelo por 2013 kaj membro-aliĝilo troviĝas ankaŭ en la retejo de UEA.

(Gazetaraj Komunikoj de UEA)

Aŭskulti la faman Esperantiston Ivo Lapenna

Novaj elŝuteblaj sondosieroj de aŭ pri prof. d-ro Ivo Lapenna troveblas en la hejmpaĝo de Fondaĵo Ivo Lapenna okaze de la 125-jara datreveno de Esperanto: www.ivolapenna.org/125.htm. (Birthe Lapenna, Fondaĵo Ivo Lapenna, informas Osmo Buller)

Premio Deguĉi al Ursula kaj Giuseppe Grattapaglia

Ges-roj Grattapaglia ricevis la ĉi-jaran Premion Onisaburo Deguĉi. La Estraro de UEA aljuĝas tiun „Esperantistan pac-premion“ pro agado, kiu per Esperanto antaŭenigis internacian amikecon kaj solidarecon en la spirito de d-ro L.L. Zamenhof kaj Onisaburo Deguĉi. La premio estis starigita en 1987 per donaco de Oomoto; ĝi konsistas el diplomo, monsumo de 2.000 € kaj donaceto de Oomoto.

(Gazetaraj Komunikoj de UEA)

Ĉu la plej granda Esperanto-libro?

Kiel rezulto de 20-jara laboro de d-ro Máthé Árpád, aperis en Budapeŝto „Bibliografio de Esperantaj periodaĵoj.“ La datumbaza kolekto listigas 14.173 Esperanto-gazetojn, revuojn kaj aliajn periodaĵojn ekde 1887 ĝis hodiaŭ, kun iliaj nomoj, eldonjaroj, redaktoroj, ĉefaj sciindaĵoj, ktp. Verŝajne la libro estas unu el la plej grandaj Esperanto-libroj, ĝi pezas 3,3 kilogramojn kaj enhavas 1155 paĝojn en formato A4. La datumbazo de la periodaĵoj aperas ankaŭ en pdf-formato, kiu ebligas rapidan serĉadon kaj trovon de unuopaj esprimoj. Redaktoro de la bibliografio, d-ro Máthé Árpád estas kontaktebla pere de la adreso: oficejo@eventoj.hu

(Ret-Info)

Reta C1-Kurso en la universitato de Krakovo

Se vi deziras plialtigi vian konon de Esperanto je unu nivelo, jen eblo partopreni kompletan, baldaŭ komenciĝontan en Interreto universitatan C1-kurson. Ĝi estas oficiala kurso de la fama universitato, Jagelona Universitato en Krakovo, Pollando. La propono koncernas tri eksterlandanojn (el la tuta Okcidenta Eŭropo, inkluzive de la okcidenta parto de Skandinavio).

Jagelona Universitato havas ĉiajn eblojn, helpi esperantistojn el diversaj

landoj lerni la lingvon je supera nivelo, kaj ni foje invitas lernemajn personojn. La kursoj estas utilaj precipe por tiuj, kiuj ne trovas lerneblon en sia loĝloko. Partoprenis ilin jam sukcese kaj ĝoje esperantistoj el kelkdekoj da landoj.

La lernado disvolviĝos plene en Interreto, vive, realtempe. La lecionoj okazados 1-2-foje semajne, dum unu universitata jaro (du semestroj). Unu el la lerntagoj estos merkredo (eventuale jaŭdo), komenco de la leciono: 20.45 (la horo en Pollando). La alia tago estos interkonsentita kun la partoprenantoj.

La tuta unujara, 90-hora kurso (+ 30 horoj da propra, gvidata ret-lernado) kostas 387 eŭrojn.

Internacieco de la partoprenantaro de niaj kursoj donas pli da ebloj por natura konversacio dum kaj ekster la lecionoj. Ĝi ankaŭ kontribuas al interkultura pliriĉigo de la enhavo de parolaj aktivaĵoj.

Informoj, aliĝoj: <http://esperanto.instruado.jag.univ.pl>

Maria Majerczak

Gvidantino de Esperanto-instruado en Jagelona Universitato,
mmajerczak@gmail.com

Esperanto-ponto en pola urbo Bydgoszcz

Okaze de 125-a datreveno de Esperanto Konsilio de la urbo Bydgoszcz decidis honorigi la jubileon per donado de la nomo „Most Esperanto“ al la ponto-konstruaĵo ĉe la rivero Brda. Oktobre okazis oficiala malkovro de du tabuloj kun surskribo „Most Esperanto“ en ambaŭ flankoj de la ponto. La ceremonion gvidis en Esperanto (!) kaj Pola lingvo Lech Zagłoba, prezidanto de la urba Komisiono pri Kulturo kaj Edukado. La ceremonion partoprenis kelkdek personoj el Pollando kaj gastoj el Germanio, Kazahio, Rusio kaj Senegalio; raportis pri ĝi ankaŭ la urba televido.

(Andrzej Grzębowski kaj Ret-Info)

Kolektis kaj prilaboris Uwe Stecher